

Date – 26/11/2024

Time - 18:30 -18:40Hrs

- All Mizoram Village Council Association chuan Village Council term pawh tawi a ni chu lungawi lovin Mizoram sorkar chu High Court-ah khin an rel.
- Aizawl a Central Goods and Services Tax chuan kumin sorkar tangka kumthar atanga chhut a tun thla November thlenga an chhiah an khawn tlingkhawm chu cheng vaibelchhe 134 a tling tih an sawi.
- Vawiin khan ram danpui ni National Constitution Day vawi 75-na hman a ni.
- Sawrkar laipui chuan khuarel chhiatna laka invenna leh hmanruate tih changtlunna turin Mizoram tiamin state 15 hnenah cheng vaibelchhe 1115 a pe chhuak dawn.

<><><>

AMVC

All Mizoram Village Council Association chuan Village Council term pawh tawi a ni chu lungawi lovin Mizoram sorkar chu High Court-ah khin an rel.

All Mizoram Village Council Association General Conference, Dawrpui Multipurpose Hall Aizawl a vawiina neih ah kalkhawmte chuan resolution siamin, Mizoram, Mizo hnam leh khawtlang hmawsawna tura theih tawp chhuah chhunzawm zel tura an inpeih thu leh, tualchhung rorelna tha leh nghel nghet a awm theih nan an beih zel tur an sawi a, Village Council zahawmna leh ropuina pal zut chu engtikah mah rem an ti ngai dawn lo a, VC lo la ni leh zel turte tan pawh a Village Council nghel nghet leh rintlak siam tura theihtawp an chhuah dawn an ti a ni.

VC term pawhtawi chungchanga Mizoram sorkar khinna tur sum hi vawiina kal khawmte hian thawh khawm nghalin hmalak nghal an remti a ni.

AMVCA President Pu K. Lalngaizuala chuan hemi chungchang kan corr a hrilh dan lo ngaithla ang.

Vawiina All Mizoram Village Council Association khawmpui hnampuitu Local Administration Department Minister Pu C. Lalsawivunga chuan Mizoram Village Council inthlan sawn hma a nih chhan chu state sorkar sum lama a pachhiat vang a nih thu a sawi a.

Minister chuan Village Council inthlan chungchanga thuthlukna siam chu thil harsa tak a nih thu leh kumthar lamah Mizoramin inthlan pali ngawt a hmachhawn dawn avanga sum leh pai senso a hautak lohna atan Village council inthlan chu kumin sorkar tangka kum chhunga neih mai tura an tih tak thu a sawi.

Pu C. Lalsawivunga chuan VC te inenkawlna dan chu kum 1953 daih tawha zam a nih thu sawiin, Lushai Hills Village Council Act chu a hunlaia dan tha tak ni mah sela, kum 71 lai hman a nih tawh avang leh tunlai changkanna leh hmasawna nena inhne rem lo a tam tawh avanga siam that a ngaih tawh takzet a ti a, hemi atan hian hun hmasa lama sorkar pawhin an theihtawp an lo chhuah tawh thu sawiin LAD lam hotute leh mi thiam hemi atana ruat bikten dan thar a awm vat theihna atana hma nasa taka an lak thu leh dan thar Mizoram Village Council Act 2024 chu Law Department –ah a draft bill VAT tura a awm mek thu a sawi bawk.

LAD Minister chuan Village Council kalkhawmte chu sorkar laipui atanga hmasawna tura sum an dawnte chak tak leh fel fai taka hmang vat turin a hrilh a, sum hman lawk loh leh muang taka hmasawna hna thawh chuan a hnu leh zela sorkar laipui atanga sum rawn kal leh turah harsatna a siam thin thu sawiin, Mizoram hmun hrang hrang a Village Council-te pisa Panchayat Bhavan sak mek

pawh a lo sa hmasa tuten hna an thawh muan avangin a hnu leh a sa turte tan harsatna nasa tak a thlen thu a sawi bawk.

<><><>

CM

Chief Minister Pu Lalduhoma chuan Education Department hmalakna hrang hrang vawiin khan a enpui a,

Secretariat Conference Hall-a hun hmanah hian thusawiin Chief Minister chuan Department tinah service review committee din turin an ti mek a. Sawrkar hnathawk, chhawr tlak si loh an kawl te dan ang taka chhuahtir mai tha an ti a ti a. Sawrkar hnathawk quality tha neih an tum tlat tih a sawi a ni.

Meeting hi Education Minister Dr. Vanlalhlana chuan a kaihruai a, Chief Minister-in department te hmalakna enpui a meeting a buatsaih hi tunhma lama la awm ngai lo thil thar a ni a ti a. A lo neihpui tawhten an hlawkpuizia te an sawi niin a sawi a ni.

<><><>

GST

Aizawl a Central Goods and Services Tax hotute chuan kum 2024 sorkar tangka kumthar atanga chhut a tun thla November 2024 thenga an hnena chhiah pek tlingkhawm chu cheng vaibelchhe 134 a tling tih an sawi.

Akashvani Correspondent in a kawm naah Central GST hotute chuan Goods and Services Tax chu kum 2017 July thla a hman tan a ni a, Mizoram chhungah mi 8000 chuang Goods and Services Tax-ah an in register tawh a, Central GST hnuaiah mi 3400 an in register tawh a leh a bak mi 4600 vel chu State GST hnuaia in register an ni.

GST hotute chuan chhiah pe tu ten sum fai emaw input tax credit hmanga chhiah an pek theih thu sawiin an chhiah hmuh chu nikum November thla leh kumin march ni 31 inkar aiin kumin April ni 1 atanga tun thla thleng khan zaa 37 velin a pung a, anmahni hnuai bika chhiah lut zingah za a 70 chu NHIDCL leh PWD hnuaia contractor-te chhun luh a nih thu an sawi am, hei bakah hian lirthei zuar te leh Mobile Phone Service Provider-te leh thawmhnaw zuarte pawhin an hnenah chhiah an chhun luh thin thu an sawi bawk.

Central GST hotute chuan input tax credit hriat fiah tawk loh avangte, sorkar atanga contractor ten an bill an hmuh tlai thin avangte leh GST lam ngaihtuah tawk lo an awm thin avang te in an beisei ang a chhiah an hmuh tawk loh thu an sawi a, sumdawngte pawh danin a a phut ang a dawr hming leh account bu te vawng felfai a, GST registration leh certificate-te mahni sumdawna hmun theuh va tarchhuak tura an duh thu an sawi a, GST mahni a khawih thiamlo midang khawih tir an awm thin thu leh a buaipui sak tuten an ngaihthah avanga harsatna tawk an awm thin thu an sawi bawk.

Aizawl Central GST hotuten GST chungchanga mipuite hnena hriattur pawimawh an sawi kan Correspondent hnen atangin i lo ngaithla ang:

Voice Cast : Central GST hotute chuan tunlaiin Goods and Services Tax registration ti thei ni a in sawi, mi bum ching an awm niin an sawi a, heng mite hian aadhar card, pan card leh GST tihna atana document pawimawh mi hnen atanga laksak-in thil diklo tih nan an hmang thin thu an sawi a, hemi chungchangah hian mipuite chu fimkhur tur leh GST chungchanga harsatna leh hriat duh neite tan Aizawl Upper Khatla-a GST office a thawktute chu an awm reng thu sawiin, office hun chhungin tu te tan pawh a dawr theih reng an nih thu an sawi.

<><><>

ROAD SAFETY WEEK

Zoram Drivers' Union in karkhat aw h tur Lirthei Khalh Fimkhurna Hapta an huaihawt chu tukin khan Transport Minister Pu Vanlalhlana a hawng a. Kumtin Mizoram pumah Zoram Drivers' Union (ZDU) in he Hapta hi an kalpui thin a ni.

Transport Minister Pu Vanlalhlana chuan Road Safety chu lirthei khaltute tan chauha ngaihna a awm thin a. Kawngpui hmangtu zawng zawng – driver, passenger leh ke a kal thin te a huam vek a ni tih hriat a pawimawh a ti.

Kumina Road Safety Week thupui atan hian Fimkhur la, nun Chhanhim rawh tih hman niin lirthei khalh fimkhurna hapta hman tan hawnna inkhawm hi Zoram Drivers Union President F Dosang'an a kaihruai a ni.

Hetihlai hian, sorkar chuan thlathar ni 9 atangin ngaihnathiamna tel lova lirthei neitute leh khalhtute dan an zawm leh zawmloh endik runpui, No Tolerance drive chu Aizawlah kalpui a ni dawn tih Traffic Sr SP chuan thuchhuah siamin a sawi a ni.

<><><>

AIR ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

<><><>

NATIONAL CONSTITUTION DAY

Vawiin khan ram danpui ni National Constitution Day vawi 75-na hman a ni a. Sawrkar laipui chuan vawiin atanga tanin kum khat chung National Constitution Day hi hman turin a puang a. Kum 2025 November ni 26 thleng lawm a ni ang.

President Droupadi Murmu-i chuan he ni puala Samvidhan Sadan Central Hall-ah thusawiin khua leh tuite chu ram danpui constitution-a thu inphumte an nunphungah lalut a, an tih ve tur fundamental duty-te ngai pawimawh turin a sawm a. Kum 2047-a ram changkanga India siam anih theih nan theihtawp chhuah turin a sawm bawk a ni.

Vawiina Constitution Day hmannaah hian Prime Minister Narendra Modi, Union Minister, Leader of Opposition Rahul Gandhi, Lok Sabha leh Rajya Sabha memberte an tel a ni.

Kum 1949 vawiin angah khan Constituent Assembly chuan ram danpui hi a pawm a. Kum 1950, February ni 26 ah a taka hman tan a ni.

Vawiin Constitution Day hriatreng nan hian pawisa thir leh stamp a bika siam tlangzarh a ni dawn bawk a ni.

Kan Corr report I lo ngaithlak chhunzawm ang u.

<><><>

PM

Prime Minister Narendra Modia chuan Indian Constitution kum 75-na pualin mipuite chibai a buk. Pu Modia chuan ram danpui chu ram tana hruaitu eng a ni a ti a. Vawiinah hian ramin theihna sang tak nen hmalam a pan mek zel a ni a ti bawk.

<><><>

DISASTER

Sawrkar laipui chuan khuarel chhiatna laka invenna leh hmanruate tih changtlunna turin Mizoram tiamin state 15 hnenah cheng vaibelchhe 1115 a pe chhuak dawn. Union Home Minister Amit Shah-a hova High-Level Committee thukhawm chuan he sum ruahman hi a pawm a. Hmarchhak state pariatte tan cheng vaibelchhe 378, Uttarakhand leh Himachal Pradesh tan cheng vaibelchhe 140 ve ve, Mahrastra tan cheng vaibelchhe 100, Karnataka leh Kerala tan vaibelchhe 70 ve ve leh Tamil Nadu leh West Bengal tan cheng vaibelchhe 50 ve ve a pe dawn a ni.

<><><>